

## ببذه عن تاريخ المغول في العراق المرحلة الثالثة تاريخ العراق الحديث م.د.ساهرة حسين محمود

في سنة 1258 وقعت بغداد في ايد المغول و دمروها و ابادوا سكانها و قبضوا على الخليفة العباسي المستعصم بالله و رجالته و ركوه بالرجلين لحد الموت.

### سقوط بغداد



ابتدت حكاية سقوط بغداد في ايد المغول بتولى هولاء بن تولوي الحكم في الخانية فارس. الخان الاكبر مونجوقاخان طلب منه سنة 1256 انه يكمل المشوار اللي بدأه جده جنكيز خان.<sup>[1]</sup>

بعد هولاء ما دمر قلعة الموت بتاعة الحشاشين ( الاسماعيليين )، بعث جواب لخليفة بغداد المستعصم بالله يهدده و يتوعده إنه رغم إنه أظهر طاعته و خضوعه لكن ما ساعدهوش في أخذ قلعة الموت و قاله " إنت أظهرت الطاعة بس ما بعثت عساكر " ، و امره بإنه يهدم الحصون و الخنادق في بغداد و يروح يقابله، و قاله : " لما اقود الجيش لبغداد، مندفع بسورة الغضب، فإنك لو كنت مختفي في السما .. حا أنزلك من الفلك الدوار و حا أرميك من عليائك لتحت زي الأسد. و مش حاخلي حي في مملكتك. و حاخلي مدينتك و إقليمك و أراضيك طعمه للنار". فرد عليه الخليفة بهدايا و تحف و جواب ينافقه و يقول له فيه انه : " مع الخاقان و هولاءوخان قلب واحد ولسان واحد".

### الخليفة

سقوط بغداد كان نتيجة مباشرة لتدمير الدولة الخوارزمية على حدود المنطقة العربية على ايد المغول اللي شجعهم الخلفاء العباسيين و أغروهم بيها. المغول بقيادة جنكيز خان اجتاحوا اراضي الدولة الخوارزمية ( 1220-1221 ) بتحريض من الخليفة العباسي اللي اعتبر ان المغول حا يحمو دولته<sup>[2]</sup> و إستولوا على بخارى و سمرقند و بعدها بسنتين حاصروا عاصمة الدولة الخوارزمية. في بغداد الخليفة العباسي " ابو العباس احمد الناصر لدين الله " كان خايف من الخوارزمية و قاعد ينافق في المغول و بيعت لهم هدايا و فلوس و يشجعهم على غزو الدولة الخوارزمية<sup>[3][4]</sup>، و هو بضيق افقه و السلطه عميه مش دريان إن هدف المغول اكبر من أخذ خوارزم، و إنهم لو أخذوها بلاد الشرق و اولها بغداد حا تبقى مفتوحة قدامهم و فركة كعب لجيوشهم. استعانة الخليفة العباسي الناصر لدين الله بالمغول ضد الخوارزمية كانت غلطة كبيرة ، و سقوط المملكة الخوارزمية في ايد المغول كان نذير شؤم على الخلافة العباسية.<sup>[3]</sup>


اتوفى جنكيز خان مؤسس الامبراطورية المغولية سنة 1227 ، و بموته اتقسمت امبراطوريته على ولاده الأربعة، چوچي و چغتاي و اوكتاي و تولوي ، كل واحد فيهم أخذ له حته يحكمها. في سنة 1230 المغول غلبوا و قتلوا جلال الدين سلطان خوارزم اللي فضل

بداية 29 يناير 1258  
نهاية 10 فبراير 1258  
البلد ■ العباسيين

### الموقع بغداد

33°20'00"N 44°26'00"E (https://geohack.toolforge.org/geohack.php?page\_name=%D8%B3%D9%82%D9%88%D8%B7\_%D8%A8%D8%BA%D8%AF%D8%A7%D8%AF\_(1258)&params=33.3333\_N\_44.4333\_E\_glob&e:earth\_type:landmark)

مده طويلة يقاوم بشجاعه ، و استولوا على كل خوارزم و عملوا فيها مدابح رهيبه. و بكنه بقت بلاد الشرق مفتوحه قدامهم و ما بقاش فاضل لهم إلا إنهم يدخلوا بغداد ويزحفوا على الشرق الاوسط.



فى سنة 1242 اتولى أبو أحمد عبد الله المستعصم بالله الخلافة فى بغداد و كان الخليفة العباسى الرابع و الثلاثين ، و هو الخليفة اللى قال عنه المؤرخ ابن أيبك الدوادارى إنه " كان فيه هوج، و طيش، و ظلم، مع بله، و ضعف، و انقياد ل أصحاب السخف. يلعب بطيور الحمام، و يركب الحمير المصرية الفراء " [5] و هو الخليفة اللى بعت لل مصريين يستهزء لما نصبوا شجر الدر سلطانه على مصر و قالهم: " إذا كات الرجال عدمت عندكم قولوا فنبت لكم رجاله " فى الوقت اللى كان هو و رجالته عمالين يبعثوا فلوس و هدايا للمغول [6]، و فى الوقت اللى كانت هى حققت انتصار كبير على صليبيين الحملة الصليبيه السابعه.

المستعصم بالله ما كانش الوحيد فى المنطقه العربيه اللى بيتعامل مع المغول و بينافقهم، بدر الدين لؤلؤ حاكم الموصل خضع ليهم بإرادته الحره من غير تهديد، و أخذ على عاتقه انه يجبى لهم فلوس و مكوس من الشام [7]، و الناصر يوسف حاكم دمشق كان بيتصل بيهم فى السر و ببيعت لهم ابنته " الملك العزيز " و وزيره " زين الدين الحافظي " بهدايا و تحف على أمل انهم يرضوا عنه و يحالفوه ضد مصر [8]، و الملك المغيث حاكم الكرك كان خاضع ليهم برضه بإرادته الحره و ببيعتلهم رسل [9]

الطريق كان ممهد للمغول لدخول بغداد و اقتحام الشرق الأوسط و محاولة الوصول لمصر هدف المغول و الصليبيين الاكبر و كل المتآمرين معاهم.

## نكبة بغداد

فى اواخر صيف سنة 1256 اتنكبت بغداد بسيل ضخم غرقها و اختفت منها بيوت و محلات كثيره عن طريق المايه و عن طريق عمليات النهب و السلب اللى قام بيها الناس اللى كان بيحركها مجاهد الدين دودار الخليفه ، و اتحولت نص أراضى العراق لخرابه و اتسمى السيل ده " الغرق المستعصمى " ، و بعد الغرق المستعصمى هاج مجاهد الدين و ابن العلقمى وزير الخليفه على بعض و حصلت اضطرابات كبيره فى ارض الجزيره ( العراق ) و بغداد ، خدت طابع اتنى عنصرى و حرب اهليه عرقيه مصغره بين السنه و الشيعه. [10][11]




المغول يبيقتحموا بغداد 1258

فى الغضون دى كان هولوكو استولى على قلاع و حصون الحشاشيين فى قهستان و رودبار و قومس و وزع غنائمها على قواده و عساكره، و طلع على قاعدتهم فى قلعة ألموت اللى استسلمت له بعد ما حاصرها قواده " بلغاى " و " طايير بوقا " ، و استولى على سلطنة الروم و دمرها بقيادة " بايجو نويان " [12] بكنه بقت كل الطرق توصل لبغداد فكتب هولوكو من همذان جواب للخليفه المستعصم يقوله فيه انه اظهر الطاعة لكن ما بعثش عساكر تساعد، و انه اكيد سمع عن اللى حل بالعالم على ايدين جيوش المغول من ايام جنكيز خان و حذره: " احذر الحقد و الخصام، و ما تضربش المخصف بضربة ايديك، و ما تلتخش الشمس بالوحل فتتعب ". و بعد ما حذره رجع يقوله انه ممكن يسامحه إذا هدم حصون بغداد و ردم الخنادق و راح يقابله او بعت مندوبين عشان ينقلوا له رسالته و حذره تانى انه: " إذا ما سمعش النصيحه، و فضل الخلاف و الجدل، فيبقى عليه انه يعبى عساكره و يحدد ساحة القتال " [13]

## بين هولوكو و الخليفه





الدولة الخوارزمية ما بين 1190م و 1220م

المستعصم بلع ريقه و بعث شرف الدين بن الجوزي و بدر الدين النخجواني برد لهولاكو فيه اهانات و تحدى زي : " أيها الشاب الحدث ! المتمنى قصر العمر، و من ظن نفسه محيطا و متغلبا على كل العالم مغترا بيومين من الإقبال " و " الا يعلم الامير أنه من الشرق الى الغرب، و من الملوك الى الشحاذين، و من الشيوخ الى الشباب ممن يؤمنون بالله و يشتغلون بالدين، كلهم عبيد ده البلاط و جنود لي. إنني حينما أشير بجمع الشتات، سأبدأ بحسم الامور في إيران، بعدين سأتوجه منها الى بلاد توران، و أضع كل شخص في موضعه ". و في الاخر قاله انه مش عايز يحاربه و كمل : " خصوصا و إنني مع الخاقان و هولاكو خان، قلب واحد و لسان واحد" و ختم بقوله : " إن لي ألؤفا مؤلفة من الفرسان و الرجالة .. وهم متأهبون للقتال "، و مع الجواب بعث المستعصم تحف و هدايا لهولاكو [14]



بدر الدين لؤلؤ حاكم الموصل خضع للمغول بإرادته الحرة.

و رسل هولاكو راجعين في السكه طلع عليهم الناس شتموهم و تفوا على وشوشهم و قطعوا لهم هدومهم. و لما و صلو عند هولاكو و سمع منهم عن اللي شافوه في ارض الخليفة قال : " الخليفة ده ما عندهوش أي كفاءة، ده عامل معانا زي القوس المعوج .. بس أنا حأخليه مستقيم زي السهم "، و لما دخلوا رسل المستعصم و قرا الجواب غضب من كلام الخليفة اللي اعتبره خالي من اللياقه، و قال : " إرادة الله مع الناس دول امر تاني ، حيث انه دخل في دماغاتهم أوهام زي دي ". [15] و هولاكو كان محق في دي لإن الخليفة إما كان كلامانجي او كان فعل بيتخيل ان عنده رجاله بجد ، و انهم حا يهبوا لنجدته من الشرق و الغرب ، ما كانش دربان ان الكل حواليه كانو زيه بينافقوا هولاكو، بما فيهم وزيره ابن العلقمي اللي اعتبره مؤرخين انه كان عميل للمغول ، و إن فيهم اللي خضعوا لهولاكو رسمى زي بدر الدين لؤلؤ حاكم الموصل ، و إن عسكر الشام و ملوكه كانو ساعتها باصين جهة الغرب طمعانيين في مصر مش جهة الشرق ناحية المصيبيه اللي جايه لهم.

هولاكو رد على الخليفة بجواب جه من ضمنه : " انت فتنك حب الجاه و المال و العجب و الغرور بالدوله الفانيه، بحيث ما بقاش يائر فيك نصح الناصحين بالخير، و في ودنك و قر مش مخليك تسمع نصح المشفقين " و هدهد : " يبقى عليك دلوقتي انك تكون مستعد للحرب و القتال، لآني رايح على بغداد بجيش زي النمل و الجراد ". [16]

لما الخليفة قرا رد هولاكو اتخض و سأل وزيره ابن العلقمي يعمل ايه، فقال له ابن العلقمي إن أحسن حاجه يعملها هي انه يعتذر لهولاكو و يبعثه فلوس كتيره و اعداد كبيره من الجمال و الحصنه و الهدايا و التحف. فاعجب الخليفة بنصيحة وزيره ، و امر بتجهيز الحاجات دي ، لكن دوااره مجاهد الدين اللي كان متخانق مع ابن العلقمي نصحه انه ما يعملش كده، فرجع في كلامه و بعث لابن العلقمي يقوله : " لا تخشى القضاء المقبل، و لا تقل خرافة، بيني و بين هولاكوخان و اخيه منكوقآن صداقة و الفة، لا عداوة و قطيعة. و حيث إنني صديق لهما، فلا بد أنهما ايضاً يكونان صديقين و مواليين لي، و إن رسالة الرسل غير صحيحة ". و بكده عرف ابن العلقمي إن نهاية دولة العباسيين أو شكت. [17]



أطلال قلعة الموت، قاعدة الحشاشين

ابتدا ابن العلقمي يجهز جيش و لم شوية عرب على شوية تراكوه على أمل إن لما هولاكو يشوف إن فيه جيوش بتتجمع يخاف و ما يهاجمش بغداد، لكن لما طلب ابن العلقمي من الخليفة انه يطلع فلوس عشان يدفعوا للعساكر دي مارضاش الخليفة فينس منه ابن العلقمي ، لكن الخليفة بدل ما يدفع للعسكر، بعث هديه لهولاكو و معاها جواب قاله فيه إن كل اللي قصدوا عيلة بنى العباس و بغداد كانت عاقبتهم و خيمه و ختمه بقوله : " مش من المصلحه أن يفكر الملك في قصد عيلة العباسيين. فأحذر عين السؤ من الزمان الغادر ". فغضب هولاكو و رد عليه بشعر بيقول في آخرته : " حأنزلك و لو كنت في السما .. و حأدفع بيبك غصباً ل أفواه السباع ". [18]

هولاكو كان يجهز لغزو بغداد و كان بيعت للخليفة إنذارات واضحة، الخليفة ما قدرش يفهمها بسبب عمى سياسى و افكار غلط معششه فى دماغه و اعتماد على رجاله وهميين ، فكان بيرد عليه بهدايا و فلوس و أشعار و تخاريف و اهانات ، من غير ما ياخذ موقف واضح ، يسالمة او يحاربه، و من غير ما يدري انه بالطريقه دى ما بيعملش حاجه أكثر من إستفزازة. و ده بيعضد رأى المؤرخ ابن أيبك الدواداري إنه " كان فيه هوج، وطيش، وظلم، مع بله... "، و رأى ابن تغرى انه كان " قليل المعرفه بتدبير الملك نازل الهمه ".<sup>[19]</sup>

## تجمع جيوش المغول و الطلوع على بغداد

ابتدا هولاكو يجهز لغزو بغداد، فأمر بتحريك جيوش " جرماغون " و " بايجو نويان " من معاقلها فى بلاد الروم و تطلع على بغداد عن طريق اربل و الموصل و تستنى فى غرب بغداد. و امر قوات " بلغا بن شيبان بن جوجى " و توتار بن سکنقور بن جوجى " و " قولى بن أروه بن جوجى " و " بوقاتييمور " و " سونجاق " بالتوجه ليه ويقفوا فى الميمنه ، و امر قوات " كيتوبو قانيون " و " قدسون " و " نرك ايلكا " بالزحف من حدود لرستان و بيات و تكريت و خوزستان و تقف فى الميسره. و اتجمعت الجيوش فى مرج " زكى " فى ضواحي همدان تحت قيادة " قياق نويان " .<sup>[20]</sup>

فى أواخر يناير 1257 اتحرك هولاكو بالجيوش المغوليه اللى اتجمعت و فى صحبته الامرا المغول و القواد و كل ملوك و كتاب بلاد ايران. و لما وصل أسد آباد بعث رسول للخليفة المستعصم يطلب منه يروح له فقعد المستعصم يماطل، و بعث له ابن الجوزى بجواب يحذره من مغبة هجومه على بغداد، و يعرض عليه تسليمه الخزائن مقابل انه يرجع. و رد هولاكو عليه : " إزاي نفوت زيارة الخليفة بعد كل الطريق اللى قطعناه. حا نبقى نرجع بإذنه بعد ما نزوره و نكلمه " .<sup>[21]</sup>

و جهز هولاكو قوات بقيادة قدغان و كتبغا نوبين وبعثها للاكراد عند ديار بكر و هرب الاكراد مفزوعين و استخبو فى الجبال لكن المغول اتعقبوهم و عملو مباح فيهم و اسرو منهم اعداد <sup>[22]</sup> ، و اخدو كل اللى فى كرمانشاه و بعد ما خلصو منهم هاجمو طلائع جيش بغداد و قبضوا على ايبك الحلبي و سيف الدين قلج و عينوهم مرشدين لطلايع قوات المغول. و بعث هولاكو من تانى رسل للخليفة يقوله : " إذا كان الخليفة دخل فى الطاعه فلازم يخرج، او يجهز للقتال " <sup>[23]</sup>

فى 16 يناير 1258 عدى بايجو نويان و بوقاتييمور و سونجاق نهر دجله عن طريق نهر دجيل و وصلو لنواحي نهر عيسى و طلب سونجاق نويان من بايجو انه يمسك قيادة جيش غرب بغداد و راح هو على حريية .<sup>[24]</sup>

لما سمع مجاهد الدين اللى كان يقود جيش بغداد مع " ابن قر " ان المغول عدوا لصفة دجله الغربيه راحوا التحموا بقوات سونجاق و بوقاتييمور على حدود الأنبار فهرب المغول و انضموا لقوات بايجو ، و فتح المغول سد على النهر فغمرت المايه الصحرا ورا جيش بغداد. و فى الفجر هجم بايجو و بوقا تييمور على قوات مجاهد الدين و ابن كر و غلبوهم و انهزم جيش بغداد و هرب مجاهد الدين مع كام واحد على بغداد و الباقيين هربوا ع الحلة و الكوفة و اتقتل ابن كر و معاه حوالى 12.000 بغدادى غير اللى غرقوا و اللى ماتوا فى الوحل .<sup>[25]</sup>

استولى بوقاتييمور و بايجو و سونجاق على غرب بغداد و دخلوا لأحيائها على شط دجله، و وصل بوقانويان وأمرأ تانينين ل " نجاسية " بجيش ضخم، و طلع هولاكو من معسكراته فى " خانقين " و نزل فى شرق بغداد فى 18 يناير 1258 ، و ابتدا المغول يتدفقوا على أسوار بغداد زى النمل و الجراد من كل جهه و ناحيه و حاصروها و حطوا حيط اتحموا بيه <sup>[26]</sup> ..

كانت فيه قوات من الموصل ضمن جيش هولاكو، بعثها بدر الدين لؤلؤ للمساعدته و إظهار الولاء الكامل للمغول و شاركت بعد كده بقيادة ابنه الصالح ركن الدين اسماعيل فى حصار ميفارقين بالمجانيق.<sup>[11][27]</sup>

## حصار و دك بغداد

فى 29 يناير 1258 ابتدت المجانيق تدك بغداد. هولاكو كان فى قلب الجيش المغولى من طريق خراسان على شمال بغداد قدام البرج العجمى. القواد ايلكا نويان و فريا كانو قدام بوابة كلوانى، و القواد قولى و بولغا و توتار و شيرامون و أرقبو كانو فى عرض المدينه قدام بوابة سوق السلطان ، و القواد بايجو و سونجاق كانو مرابطين فى غرب المدينه قدام المارستان العضى. اتصوبت المجانيق بإتجاه برج العجمى و قدر المغول انهم يعملوا ثغره فيه.<sup>[26]</sup>

جيش بغداد اللى وصفه ابن كثير بـ " القلة و نهاية الذلة " كان تعداده 10.000 عسكرى، لإن الخليفة كان سرح عساكر الجيش من خدمه، و اتحول عدد كبير منهم لشحاتين بيدوروا فى الأسواق و بيقدعوا على أبواب الجوامع يشحتوا من الناس.<sup>[11]</sup>



حصار بغداد 1258

لما شاف الخليفة انه رجالته مالهش قدره على مواجهة المغول بعث وزيره لهولاكو يقوله : " الملك أمر ياني أبعث له الوزير و أديني لبيت طلبه فالمفروض الملك يكون عند كلمته ". فرد عليه هولاكو : " الشرط ده انا طلبته لما كنت على باب همذان. دلوقتي إحنا على باب بغداد. دلوقتي حصل إضطراب و فتنه، فإزاي أقبل بواحد ؟ لازم تبعت التلاته دول : الدوادار و سليمان شاه و الوزير ". فبعثه الخليفة تاني يوم الوزير و صاحب الديوان و شوية شخصيات لكن هولاكو رجعهمله و استمر العراك و الدك ست تيام. ورمى المغول بالسهام منشورات جوه بغداد من ست جهات مكتوب فيها إن القضاء و العلماء و الشيوخ و الأكابر و التجار و كل اللي ما بيحاربش المغول لهم الأمان.<sup>[28]</sup>

يوم الجمعة 1 فبراير 1258 هدم المغول برج العجمي و يوم الاثنين اتسلق المغول السور اللي كان هولاكو واقف قدامه و قتلوا العساكر البغداديه اللي كانوا واقفين فوقيه. و على المسا بقت كل الأسوار الشرقيه فى ايدين المغول. أمر هولاكو بحط جسر و ينصبوا مجانيق و ما يخلوش أى حد يحاول يهرب بالمراكب. لما حاول مجاهد الدين يهرب بمركب ضربه عساكر بوقا تيمور بحجارة المنجنيق و السهام و قوارير القطران و خداو تلت مراكب و اضطر مجاهد الدين يرجع بغداد.<sup>[29]</sup>

لما يئس الخليفة بالكامل من قدرة رجالته، و عرف انه مش ممكن يحتفظ ببغداد قال " حأسلم و اطبع " و بعث رسل لهولاكو بهدايا و تحف لكن هولاكو ما اهتمش بيها.<sup>[30]</sup> لانه طبعاً كان عارف ان جوه بغداد اكثر من كده بكتير.

يوم التلات 5 فبراير بعث الخليفة ابنه ابو الفضل بفلوس كتيره لكن هولاكو رفضها، فبعثه تاني يوم ابن تاني و معاه الوزير و جماعه من المقربين للشفاعه لكن برضه هولاكو رفض.<sup>[30]</sup>

## استسلام و سقوط بغداد

هولاكو بعث للخليفة يقوله : " الرأى للخليفة يخرج أو لاء، جيش المغول قاعد قدام الاسوار لغاية ما يخرجوا سليمان شاه و الدواتدار ". و لما خرجوا دخلهم تانى و طلب انهم لازم يطلعوا بكل اتباعهم، فطلعوا و معاهم عسكر بغداد مستسلمين ، و كانت اعداد اللي خرجوا كبيره جداً فقسّمهم المغول على مجموعات الوف و ميات و عشرات و قتلوهم كلهم.<sup>[31]</sup>

بيحكى المؤرخ بدر الدين العيني إن المغول كانوا بيستدعوا الأكابر من دار الخلافه فيخرج الواحد منهم بعياله و ستاته فياخدوهم على مقبرة " الفى " جنب " المنظرة " و يدبحوهم زى ما الخرفان بتتدبح و ياخدوا بناتهم و جواريههم.<sup>[32]</sup>

جوه بغداد استخبى الناس فى الأنفاق و مواقد الحمامات. و طلعت جماعه من اعيان بغداد و طلبوا الامان و قالوا : فيه ناس كتيره طايعه و خاضعه استنوا عليهم، لإن الخليفة حايبع و ولاده و حا يخرج هو كمان.<sup>[31]</sup>

فى اللحظة دى جه سهم فى عين أمير مغولى كبير اسمه " هندو البيتكچى " فغضب هولاكو جداً، و قرر انه ما يعتقش بغداد، و أمر بحط أمان للناس على بوابة الحلبة فبدأ الناس يخرجوا من بغداد. و قبض هولاكو على سليمان شاه مع 700 من قرايبه و قاله " انت كنت منجم ، و مطلع على أحوال السعد و النحس للبلاد ، إزاي ماقدرتش تتنبأ بسؤ مصيرك ، و ليه مانصحتش مخدومك عشان يجيلنا بطريق الصلح .. " فرد سليمان شاه : " الخليفة كان مستبد برأيه، منكود الطالع، فماسمعش نصايح الناصحين ". فأمر هولاكو بقتله هو و كل اتباعه وبعث راسه و راس مجاهد الدين و تاج الدين ابن مجاهد الدين لبدر الدين لؤلؤ فى الموصل عشان يعلقهم هناك و عيط لؤلؤ لإن سليمان شاه كان صاحبه لكن علقهم لانه كان خايف هولاكو يغضب عليه.<sup>[33]</sup>

المستعصم نده وزيره ابن العلقمى و قاله " ما تدبير امرنا " فرد عليه ابن العلقمى بيت شعر بيقول : " يظنون أن الامر سهل و إنما ... هو السيف حدت للقاء مضاربة ".<sup>[33]</sup>

يوم الحد 10 فبراير 1258 خرج الخليفة المستعصم مع ولاده التلاته : أبو الفضل ، و أبو العباس أحمد ، و أبو المناقب. و كان معاهم 3000 من الأكابر و القضاء و الأئمة و اعيان بغداد . و طلب منه هولاكو إنه يأمر سكان بغداد بانهم يسبيوا اسلحتهم و يخرجوا عشان يتعدوا . فبعث الخليفة ناس تنادى فى المدينة و ساب الناس اسلحتهم و خرجوا و قعد المغول يقتلوا فيهم و يدبحوهم.<sup>[34]</sup>



اتحط للخليفة و اولاده و اتباعه خيم جنب بوابة كلواذى فى معسكر كيتوبوقا نويان قعدوا فيها تحت الحراسه [35]

## مدبحة بغداد و اعدام المستعصم

يوم الاربع 14 فبراير 1258 اندفع المغول مره واحده جوه بغداد و قامت مدبحة كبرى قتلوا فيها كل اللى قابلوه و نهبوا كل اللى لاقوه و حرقوا المباني و كل حاجه ما عدا شوية بيوت للرعا و الغربا. حرق المغول الاماكن المقدسه فى بغداد زى جامع الخليفة و مشهد موسى الجواد و مقابر الخلفا.

استمرت المذبحة والنهب و السبى اربعين يوم [36] ، و مانجاش الا اللى قدر يستخبي. [37] بيحكى المؤرخ ابن كثير ان المغول قتلوا كل اللى قدروا عليه من رجاله و ستات و شبان و عيال و عجايز، و البغداديين كانوا بتستخبوا فى الأبار و قنى الوسخ ، و غيرهم استخبوا فى البارات و سمكروا على نفسهم الببان فكانوا المغول يجوا و يكسروا الببان او يحرقوها، و يدخلوا عليهم فكانوا يجروا على السطوح فيطلعوا وراهم و يدبحوهم، فكان دمهم بيسيل من الأسطح و يجرى فى الحواري. [38]

اتخرت بغداد بالكامل، و حرق المغول كتب العلم و الادب ، و بيتقال انهم بنوا بالكتب كوبرى. [39]



خليفة بغداد سلم هولاكو الذهب اللى كنزه

يوم الجمعة دخل هولاكو بغداد عشان يتفرج على قصر الخليفة و امر انهم يجيبوه و لما جه قاله : " انت مضيف و إحنا الضيوف!... فيالا جيب لنا اللى يليق بينا ". فأفتكر الخليفة ان هولاكو بيتكلم جد و كان بيترعش من الخوف و من رعبه نسي فىين مفاتيح الخزائن ، فطلب كسر الأقفال و جاب لهولاكو 2000 ثوب و 10.000 دينار و نفائس و مرصعات و جواهر. فأخذها هولاكو من غير اكترات و اداها للامرا و الموجودين و بعدين قال للخليفة : الفلوس اللى بتملكها على وجه الارض باينه، و دى ملك عبيدنا. لكن قول بتملك ابيه من الدفاين و هى ايه و موجوده فىين ". فأعترف الخليفة بان فيه أحواض مليانه ذهب تحت ساحة القصر، فلما حفروا هناك لقوها و كانت مليانه ذهب احمر و كل سبيكه كان وزنها 100 مثقال. بيقول مؤرخ المغول رشيد الدين الهمذانى : " قصارى القول ان كل اللى الخلفا جمعوه فى خمس قرون، حطوه المغول فوق بعضه فكان زى جبل على جبل ". [40]

بعد ما لقوا الذهب امر هولاكو بعد حريم الخليفة و لما عدوهم طلعا 700 زوجه و سريه و 1000 خدامه. فقال الخليفة لهلاكو و هو بيتضرع : " من على باهل حرمنى اللاتى لم تطلع عليهن الشمس و القمر " فقال له هولاكو : " اختار ميه من السبعميت ست و سيب الباقي ". فأخذ الخليفة الميه من قرايبه و المحببات ليه. [41]

بغداد اتحولت لركام خارج منه ريحة عفونه، و حصل وباء موت ناس كتيره من اللى ما اتقتلوش [42] ، و وصل الوباء للشام و موت هناك ناس كتيره فى حلب و دمشق. [36]

سكان بغداد أوفدوا " شرف الدين المراغى " و " شهاب الدين الزنجانى " و " الملك دل راست " لهولاكو عشان يطلبوا الأمان فأصدر هولاكو أمر بوقف النهب و قال لإن بغداد بقت ملك المغول و على كل واحد مزاوله شغلته و عيشته. و بكده نجى الناس اللى ما اتقتلوش. [43] اتقتل فى بغداد حوالى 800.000 او أكثر. [44][45]

## اعدام المستعصم

هولاكو ساب بغداد يوم 24 فبراير 1258 و راح على وقف و جلابيه و بعث الامير عبد الرحمن لأخذ خوزستان، و استدعى الخليفة اللى حس ان استدعائه علامة نحس و حس بالخوف و سأل وزيره ابن العلقمى " ما حيلتنا " فرد عليه ابن العلقمى : " لحينتنا طويلة " و كان بيقصد بكده التريقه، لانه لما نصحه يبعث فلوس و هدايا لهولاكو جهاد الدين نصحه ما يعملش كده و قال : " لحيه الوزير طويلة ". [43]

لما حس الخليفة ان نهايته خلاص قرى استأذن هولاء و طلب يروح الحمام يغسل نفسه فعاز هولاء انه بيعت معاه خمس حراس مغول، لكن الخليفة رفض و قاله : " أنا لا أريد أن أذهب بصحبة خمسة من الزبانية " ، و قعد يهلوس بقصايد و أشعار و قال قصيده مطلعها بيقول : " و أصبحنا لنا دار كجنان و فردوس .. و أمسينا بلا دار كأن لم نغن بالأمس " . [46]

فى المسا اتعدم الخليفة بعد ما المغول حطوه فى شوال او لفوه فى سجاده و ركلاه بالرجلين. و بيتقال انهم قتلوه بالطريقه دى بسبب اعتقاد عندهم و لإنهم ما كانوا عايزين دمه يجي ع الارض فيبقى له تار ، و بيتقال كمان انهم خنقوه او غرقوه . [47][48] و قتلوا ابنه الكبير ابو العباس احمد و خمس خدامين كانوا بيخدموه فى قرية " وقف " ، و اسروا بناته فاطمه و خديجه و مريم. تانى يوم قتلوا كل اللى كانوا معاه فى اسره جنب بوابة كلوانى. و قتلوا كل العباسيين اللى لقوهم و ما نجاش منهم الا كام واحد اعتبرهم المغول مش مهمين. و بعدها بيومين قتلوا ابنه التانى ابو الفضل. و بكده انتهت دولة خلفا ال عباس فى بغداد اللى حكموا بعد الأمويين، و كانت مدة حكمهم 525 سنه و عددهم 37 خليفة [49][50]

و بيتقال ان الوزير ابن العلقمى كان من ضمن اللى نصحوا هولاء بقتل الخليفة المستعصم زى ما كان هو اللى نصح الخليفة بالخروج و الإستسلام لهولاء ، و قاله ان هولاء مش حا يقتله و انه عايز يجوز بنته من ابنه ابو بكر. [37][51]

فيه قصه بتقول ان فيه طائر ابيض راح وقف بتاع ساعه على خيمة الخليفة فلما شافه هولاء استدعى الخليفة و سأله : " ايه الطائر اللى جالك ده ؟ " فرد الخليفة : " طائر سقط على الخيمة بعدين طار " ، فسأله هولاء : " قالك ايه و قلت له ايه ؟ " فرد الخليفة : " و هل يتكلم الطائر ؟ " ، فقاله هولاء : " لازم تقدر بالحقيقه، جالك منين، و قالك ايه، و قلت له ايه ؟ " و استمر الحوار بالطريقه دى، و جه فى كلام هولاء : " انتوا بتوع سحر و الطائر ده جاك رسول من أعوانك " و بعدين هولاء جاب ابو بكر ابن الخليفة و حاوره فى نفس الموضوع، و بعدين حطوهم فى شوله و قعدوا يرفسوا فيهم لغاية ما ماتوا . [52]

## فى موضوع ابن العلقمى

بخصوص موضوع ابن العلقمى و دوره فى سقوط بغداد لازم نشير هنا للإنصاف إن رغم إن المؤرخين العرب زى ابن كثير اتهموه بالخيانة و العماله للمغول ، مؤرخ المغول رشيد الدين الهمذانى ما اظهرهوش فى كتابه عن تاريخ هولاء كعميل للمغول او خاين ، لكن بالعكس وضح انه كان وزير مخلص حاول بنصايحه انه ينقذ ما ممكن انقاذه من ايد خليفه مش نبيه عمال يورط نفسه بجعجعاته فى حرب هو مش قدها ، و كانت نتيجتها تدمير بغداد و قتل الالاف. و زى ما اتقال، لما ابن العلقمى حاول يجمع جيش يحارب بيه المغول رفض الخليفه دفع مرتبات للعساكر و بدل ما يجهبز جيش محترم بعث لهولاء يستفزه بقوله : " مش من المصلحه أن يفكر الملك فى قصد عيلة العباسيين. فأحذر عين السؤ من الزمان الغادر " . و قبل كده لما قاله يراضى هولاء و يعتذر له على اهانتة ليه رفض و قاله : " لا تخشى القضاء المقبل ... و حيث إننى صديق لهما ( هولاءوخان و منكوقان ) ، فلا بد أنهما ايضاً يكونان صديقين و مواليين لى، و إن رسالة الرسل غير صحيحة " !

و بيوصف المؤرخ ابن كثير بداية حصار بغداد وصف بيبين ان الخليفه ده كان عايش فى وادى تانى و مش دريان باللى بيحصل حواليه ، بقوله : " و أحاطت التتار بدار الخلافه يرشقونها بالنبال من كل جانب لحد أصيبت جارية كانت تلعب بين يدي الخليفة و تضحكه، و كانت من جملة حظاياها، و كانت مولدة تسمى عرفة، جاءها سهم من بعض الشبابيك فقتلها و هى ترقص بين يدي الخليفه، فانزعج الخليفة من ذلك و فزع فزعا شديدا " ، و الغريب ان السهم ده كان فيه رساله من المغول بتقول : " إذا أراد الله تنفيذ قضائه و قدره أذهب عن ذوي العقول عقولهم " ! . [53]

و بيحكى المؤرخ ابن تغرى - اللى برضه اتهم ابن العلقمى بالتآمر - إن بدر الدين لؤلؤ و تاج الدين بن صلاحيا نايب الخليفه فى إربل حذروا الخليفه من نية هولاء مهاجمة بغداد و هو " لا يتحرك و لا يستيقظ " . [54]

سقوط بغداد بالشكل المخزى و الرهيب ده كان له وقع مؤلم على الناس عبر عنه المؤرخ ابن الأثير بقوله : " يا ليت امي لم تلدني، و يا ليتني مت قبل ده و كنت نسي منسياً " . [55]

و عبر عنه تقى الدين اسماعيل التنوخى فى قصيده مشهوره من 66 بيت بيقول بيت فيها : " لسائل الدمع عن بغداد أخبار .. فما وقوفك و الأحباب قد ساروا " . [39]

## بعد سقوط بغداد

بعد اعدام الخليفه، المغول ادوا مناصب لرجالته ، فعينوا ابن العلقمى وزير ، و فخر الدين الدامغانى رئيس للديوان ، و عماد الدين القزوينى نايب للأمير " قراتاى " ، و نظام الدين عبد المؤمن البندجىنى قاضى للقضاء، و نجم الدين ابو جعفر ( راست دل ) والى على أعمال شرقى بغداد و عينوا محتسبين لمراقبة المقاييس و الأوزان. و بعث هولاء ايلكا نويان و قراوقا و معاهم 3000 فارس مغولى عشان يصلحوا اللى اتهد و يحفظوا الأمن. و طلعت الناس من تحت الأرض زى ما يكونوا أموات نبشوا من القبور و

بقت الناس مش عارفه بعض ، لا الأب بيتعرف على ابنه و لا الأخ بيتعرف على أخوه.<sup>[42]</sup> و دفن الناس قتلاهم و اتطهرت الطرق من جثث القتلى و الحيوانات النافقه و اتفتحت الاسواق. و بيتقال ان هولاء كان عايز يحرق بغداد قبل ما يمشى لكن كتبغا نوين قاله بلاش يعمل كده لإن دى مدينه كبيره و مقصد للتجار و ممكن تجيب للمغول فلوس، فعشان كده سابها و ما حرقهاش.<sup>[42]</sup>

بدر الدين لؤلؤ أمير الموصل راح لهولاكو شاييل كفته على كتفه ومعاه هدايا و مجوهرات و سلمه مفتاح الموصل فخلاه يفضل أمير عليها.<sup>[56]</sup> و رجع هولاء على معسكره فى خانقين عشان يجهز لغزو سوريا. و هناك استقبل رسل من الناصر يوسف حاكم سوريا اللى بعت يطلب منه مساعدته على غزو مصر. و رد عليه هولاء بجواب قاله فيه : " اما بعد فقد نزلنا بغداد سنة ست و خمسين و ستمائة فساء صباح المبذرين، فدعونا مالکها فأبى فحق عليه القول فأخذناه اخذا وبيلا. و قد دعوناك الى طاعتنا اتيت فروح و ريحان ، و إن ابیت فخرى و خسران. فلا تكن كالباحث عن حتفه بظلفه، و الجادع مارن أنفه بكفه فتكون من الأخسرین اعمال اللی ضل سعيهم فى الحياة الدنيا، و هم يحسبون أنهم يحسنون صنعا. فما ذلك على الله بعزيز و السلام على من اتبع الهدى "

بعدها بشويه هاجم المغول سوريا و احتلوها و بعتوا لمصر جواب تهديد بيقولوا فيه " الا قل لمصرها هلاون ( هولاء ) قد اتى .. بحد سيوف تنتضى و بواتر. يصير أعز القوم منا أذلة..ويلحق اطفال لهم بالأكابر " .<sup>[57]</sup>

رجالة شجر الدر اللى نصبوها سلطانه على مصر سنة 1250 بعد ما قادتهم لنصر كبير على الصليبيين فى معركة المنصورة ما ردوش على هولاء بقصايد شعر و هدايا ، لكن أعدموا رسله و علقوا رؤوسهم على أبواب القاهرة، و خرجوا بجيش مصر و غلبوا المغول يوم 3 سبتمبر 1260 فى معركة عين جالوت الحاسمه و حرروا الشام منهم.

شوف كمان :



## المراجع

- ابن إياس: بدائع الزهور فى وقائع الدهور، تحقيق محمد مصطفى، الهيئة المصرية العامة للكتاب، القاهرة
- ابن تغرى: النجوم الزاهرة فى ملوك مصر و القاهرة، دار الكتب و الوثائق القومية، مركز تحقيق التراث، القاهرة 2005، ISBN 977-18-0373-5
- ابن كثير، البداية و النهاية، (15 جزء)، دار صادر، بيروت 2005، ISBN 9953-13-143-0
- أبو بكر بن عبد الله بن أبيك الدوادارى : كنز الدرر وجامع الغرر، (9 اجزاء) مصادر تأريخ مصر الاسلامية، المعهد الألماني للآثار الاسلامية، القاهرة 1971.

- ابو الفداء: المختصر فى أخبار البشر ، المطبعة الحسينية، القاهرة 1325هـ.
- بدر الدين العيني: عقائد الجمان فى تاريخ اهل الزمان، تحقيق د. محمد محمد امين، مركز تحقيق التراث، الهيئة المصرية للكتاب، القاهرة 1987.
- بسام العسلى: الظاهر بيبرس و نهاية الحروب الصليبية القديمة، دار النفائس ، بيروت 1981.
- بسام العسلى: المظفر قطز و معركة عين جالوت، دار النفائس ، بيروت 2002.
- بيبرس الدوادار: زبدة الفكرة فى تاريخ الهجرة، جمعية المستشرقين الألمانية، الشركة المتحدة للتوزيع، بيروت 1998.
- المقرزى: السلوك لمعرفة دول الملوك ( 8 اجزاء)، دار الكتب، القاهرة 1996.
- جمال الدين الشيال (استاذ التاريخ الاسلامي): تاريخ مصر الاسلامية، دار المعارف، القاهرة 1961.
- رشيد الدين فضل الله الهمذاني: جامع التواريخ، تاريخ غازان خان، الدار الثقافية للنشر، القاهرة 2000
- رشيد الدين فضل الله الهمذاني: جامع التواريخ، الإيلخانيون، تاريخ هولوكو، دار إحياء الكتب العربية
- رشيد الدين فضل الله الهمذاني: جامع التواريخ، الإيلخانيون، تاريخ ابناء هولوكو من آباقاخان الى كيخاتوخان ، دار إحياء الكتب العربية
- القلقشندي: صبح الأعشى فى صناعة الإنشا ( 16 جزء )، دار الفكر، بيروت.
- قاسم عبده قاسم (دكتور): عصر سلاطين المماليك - التاريخ السياسى و الاجتماعى، عين للدراسات الانسانية و الاجتماعية، القاهرة 2007.
- قاسم عبده قاسم (دكتور): بين التاريخ و الفولكلور- , عين للدراسات الانسانية و الاجتماعية، القاهرة 2008
- محيي الدين بن عبد الظاهر: الروض الزاهر فى سيرة الملك الظاهر، تحقيق و نشر عبد العزيز الخويطر 1976.
- محيي الدين بن عبد الظاهر: تشرىف الايام و العصور فى سيرة الملك المنصور، تحقيق د. مراد كامل، الشركة العربية للطباعة و النشر، القاهرة 1961.
- نور الدين خليل: سيف الدين قطز ، حورس للنشر و التوزيع، الاسكندرية 2005، ISBN 977-368-088-6
- شفيق مهدى ( دكتور): ممالك مصر و الشام، الدار العربية للموسوعات، بيروت 2008.
- عز الدين بن شداد: تاريخ الملك الظاهر، دار نشر فرانز شتاينر، فيسبادن 1983
- علاء طه رزق، دراسات فى تاريخ عصر سلاطين المماليك، عين للدراسات و البحوث الانسانية و الاجتماعية، القاهرة 2008
- Amitai-Preiss, Reuven, Mongols and Mamluks: The Mamluk-Ilkhanid War, 1260-1281 , Cambridge University Press 2004, ISBN 0-521-52290-0
- Curtin, Jeremiah, The Mongols, A History, Da Capo Press 2003 ISBN 0-306-81243-6
- Runciman, Steven, A history of the Crusades 3. Penguin Books, 2002
- ( ارنولد توينبى) Toynebee, Arnold J., Mankind and mother earth, Oxford university press 1976
- The New Encyclopædia Britannica, Micropædia, H.H. Berton Publisher, 1973-1974
- The New Encyclopædia Britannica, Macropædia, H.H. Berton Publisher, 1973-1974